

बागड़ी मसी भजन

बागड़ी मसी भजन

WIN Publication Trust

Kochi

**BAGDI MASI BHAJAN
(BAGRI)**

Copy right © WIN Publication Trust 2013

First impression: February 2013

Printed and Published by
WIN Publication Trust
44/2326, Friends Line 3,
Desabhimani Road, Kaloor,
Kochi, Kerala - 682017

Printed in India

Price: Rs 50/-

भजना गी सूची

1. यीसू जी थारी याद
2. यीसू बचन हिड़दै
3. भांत-भांत गा बचन
4. मरीयो उठीयो रे यीसू
5. यरुसलेम में खड़या
6. यीसू मन धार लियो
7. आय बचन करयो
8. में वारी जाऊं
9. देखो लीला रे
10. भाई छोड माया गो
11. आज्यो चालां रे
12. भाई रे मार-मार मन
13. अरज सुणो थे यीसू
14. मान रे मन मायला
15. धन्य कहो बानै
16. मेरो जीवन थारो
17. जकई गो भाग रे
18. यीसू है म्हारो साचो
19. अपणी देही नै भाई
20. आओ यीसू आओ
21. औ प्रभु तेरी लीला
22. यीसू जी म्हारा
23. यीसू म्हे पापी
24. यीसू आयो रे
25. आत्मा सुरगा
26. यीसू गो दरबार रे
27. यीसू चाल्यो रे
28. एक बार आओ
29. उग्यो भाण होयो
30. ऐ साथिड़ा-करो
31. जग गै कल्याण
32. आज्यो चालां
33. सूत्यो च्यार दिनां
34. धन धन यिसू
35. मेरो यीसू राजा
36. बाबो म्हारो यीसू
37. मीठी लागै यीसू
38. यीसू जी प्यारा अरज
39. यीसू पर कर बिसवास
40. आयो है भाई आयो
41. धन्यवाद करो प्रभु
42. बेगा- बेगा आओ

43. यीसू गी राह,मसीह
44. कुए पर यीसू जा
45. यीसू मसी ओ म्हारा
46. देख अधरमी जग
47. म्हे तो आया
48. म्हारै दिल में
49. बणावण आळा थै
50. नाम जप नाम यीसू
51. आप धणी सुरगा
52. यीसू जी मोटो थारो
53. यीसू मसी गै बरगो
54. करीयो यीसू जी
55. प्रभु जग माही
56. यीसू जी आपणो
57. अर्ज थानै आज करा

58. थानै मानै सब
59. यीसू गो सिमरण
60. आज्या यीसू मनड़े
61. मानै मानै यीसू
62. यीसू गी बात बताऊँ
63. मरियम गो प्यारो
64. यीसू चढिया क्रूस पर
65. थानै क्रूस गी बात
66. प्रभु मसी थे देव
67. यीसू रे म्हारै दिल
68. चार दिना गो अठै
69. म्हारै दिल नै
70. यीसू जी थे ई

दो बातां

सगळा भेन-भाइयां नै प्रभु यीसू मसी गै मीठै नाम में नमस्कार!

सारा ऊं पेलां परमेसर गो धन्यवाद करां कै बागड़ी भासा में “बागड़ी मसी भजन” गी आ पेला किताब छापण खातर साइता करी है। बागड़ी भासा में मसी भजना गी आ एक सरुआत है। परमेसर गै पवितर बचनां में लिखेडो है कै धरती गी सारी जाति अर सारी भासा गा लोगो परमेसर गी जय-जयकार करो। ओ साचो बचन आज पुरो होवंतो दिसै है।

परमेसर गी आ एक किरपा है कै बागड़ी लोग बी आपगी भासा में भजन गा'गे परमेसर गी बडाई करै अर खुसी मनावै। बागड़ी मसी लोग गी भोत सालां ऊं मांग ही कै आपगी भासा में प्रभु यीसु मसी गा भजन सत्संग में गा'गे परमेसर गी बडाई करां। बागड़ी मसी भजन मंडली परमेसर गी किरपा ऊं 70 भजन लिख्या है। आं भजना नै लिखण में भाई राजेन्द्र, विनोद, भजन, साहबराम, जीत, प्रभु राम, राम कुमार, दयानंद, रामलाल, महेन्द्र, सुमन, कृष्ण लाल, शैलजा, कमला अर गोरं देवी है।

बागड़ी मसी भजन मंडली गी हमेसा आई अरदास रेवैगी कै ऐ भजन जठै बी गाया जावै बठै परमेसर गो आसिस सदा बण्यो रेवै।

ई किताब नै छापण में परमेसर गा चूणेड़ा दास अर भोत सारा भेन-भाइयां मदद करी। परमेसर बांगी सेवकाई में बरकत देवै।

भजन - 1

यीसू जी थारी याद सतावै औ
धरती पर कद आओला म्हारा यीसू जी ।

- 1 प्रभु जी थारी राह देख-देख गे
म्हारै नैणा में भरीयो नीर । यीसू जी थारी....
- 2 प्रभु जी म्हें तो मन गै आगणै में
थारो ध्यान लगायो है । यीसू जी थारी....
- 3 प्रभु जी थारी महिमा करा म्हें आज
थानै याद करां दिन रात । यीसू जी थारी....
- 4 प्रभु जी थारी बाट म्हें जोवा औं
थे द्यो दर्सन म्हानै आय । यीसू जी थारी....
- 5 मसीआ थारै चरणा गा चाकर
म्हारै हिवडै करो उजास । यीसू जी थारी....

भजन - 2

यीसू बचन हिड्डै में धरले
पार उतरसी रे, नरक में दुख ही पासी रे ।

- 1 दर-दर फिरे तू दुनिया लार, मान बचन तू अब तो चाल
कूड़ कपट गो है औ सागो, घटतो जासी रे । नरक में दुख....

- 2 कूड़ कपट गो महल बणाय, बैठयो बंदा अब तू आय
धरी नीव थे बालू रेत गी, ढळती जासी रे । नरक में दुख....
- 3 जगत रूप में मिल्यो नर आय, भूल ग्यो प्रभु गी राह
एक दिन तो भाई जाणो होसी, सोच विचारो रे । नरक में दुख....
- 4 दास बतावै थानै साची बात, यीसू है थारो तारणहार
भीड़ पड़ै नर मन में सिमरो, आय छुडासी रे । नरक में दुख....

भजन - 3

भांत-भांत गा बचन सुणाया
बचन सुणाया आय रे मेरा प्यारा यीसू जी
चालू थारै लार ।

- 1 जगत गो रूप घणरो बतायो - २
नाही चालो लार । मरियम प्यारा....
- 2 कल्प गो बूंटो ईसवर मानो - २
थे ही बतायो सार । मरियम प्यारा....
- 3 खूब फिरयो दुनिया गै लारै - २
अब में जाणयो राज । मरियम प्यारा....
- 4 हिवड़ो म्हारो सुण- सुण झुमै - २
मनड़ो गावै राग । मरियम प्यारा....
- 5 अन्त काळ में बो ही आसी - २
कैयो मसीआ आप । मरियम प्यारा....

भजन - 4

तर्ज...पल्लो लटके गोरी गो

मरीयो उठीयो रे यीसू जद मरीयो उठीयो रे - २
लोगा नै होयो भोत अचम्भो यीसू मरीयो उठीयो रे ।

- 1 दिन उजियाळै घटा उमटी, पत्थर दियो हटाय
आसमान ऊं दूत उतरिया, खड़या कब्र पर आय,
दूतां गो रूप घणो चमकीलो जियां भाण करयो प्रकास ।
मरियो उठीयो
- 2 मगदलीनी मरियम डरगी, मन ही मन घबराय - २
दूतां बानै धीर बंधायो - ना ही डरियो आय,
यीसू तो जिन्दा होग्यो बचन रूप ऊं, खूसी मनाओ आज ।
मरियो उठीयो
- 3 आनंद ऊं बे दोड़ी - दोड़ी चेला नै समझाय - २
चेला गो मन खुसी ऊं भर ग्यो, सुण गे यीसू गी बात
खुसी में नाचै गावै दोड़या जावै, जावै यीसू गै पास ।
मरियो उठीयो

भजन - 5

तर्ज... सरवरिय ग तीर खड़ी बाई

यरुसलेम में खड़या दासीड़ा नैणा में नीर बहावै है
यीसू छोड़ चलयो संग अपणो, कोई नजर नही आवै है ।

- 1 धोखेँ ऊं बाने दुस्टां पकड़यो, राजा आगे ले जावै है
बढ चढ गो बे दोस लगावै, जरा दया नही आवै है ।
यरुसलेम....
- 2 राजा पिलातूस चोंक गयो, बो पाणी गो कळस मंगावै है
धोया हाथ बण अपणा पाणी ऊ, पाप ऊं मुक्त करावै है ।
यरुसलेम....
- 3 राजा पड़ियो आप फिकर में, यीसू ने सजा सुणावै है
मानी बात बण अपणी प्रजा गी, क्रूस गो हूकम सुणावै है ।
यरुसलेम....
- 4 ले क्रूस यीसू चाल पड़यो, दुनिया में मातम छावै है
छोटा-मोटा सब कोई रोवै, कूण बाने धीर बधावै है ।
यरुसलेम....
- 5 दुष्टां बाने क्रूस पे रेड़यो, हाथां में कील ठुकावै है
देख बेटै गो हाल बुरो मां, मरियम नीर बहावै है ।
यरुसलेम....
- 6 जगत पाप नै धोय यीसू, सब अमर नाम कूहावै है
धन-धन रे ईसवर गा बेटा, मसिआ सीस निभावै है ।
यरुसलेम....

भजन - 6

तर्ज..... सूसरा जी ऐ जोड़या दोनू हात

यीसू मन धार लियो अब आय

बचन में बडता जाओ दिन रात

- 1 यीसू जी बचन बतायो जीयां आय, बणया रेवौ बचन रूप गै मांय
चोकस रेवो बचन ज्ञान में आप, भूला ना देवै धोखे ऊं कोई आय ।
यीसू मन धार....
- 2 मसी में लियो बतिस्मो आय, जगत में राखो ना ध्यान लगाय
देखो थे अपणै रूप नै आप, यीसू जद जाणे अपणो आप ।
यीसू मन धार....
- 3 भाई रे काम क्रोध मदलोभ, सारा छोड़ देवो जग माय
मानों थे यीसू बचन गो राज, अन्त में आसी बो ही काम ।
यीसू मन धार....
- 4 मसी गो नयो भेस लियो धार, राखो ना जगत गौ रूप बणाय
प्रभु जी बेठया पास थारै आय, लेवो थे आत्मा ऊं पिछाण ।
यीसू मन धार....

भजन - 7

आय बचन करयो प्रकासी, यीसू महिमा करां थारी बड़ी भारी
बागड़ी लोग थारै बलिहारी ।

- 1 बुरै कर्मा ऊं म्हारो बंधन छुड़ायो
खोली धाम सुरगा वाळी बारी । बागड़ी लोग....
- 2 ऊंच-नीच गो भेद मिटायो
बचन सूणायो जद इक सारी । बागड़ी लोग....
- 3 अनंत जीवन गो ग्यान दियो
जद बचन सुणायो थे प्रमाणी । बागड़ी लोग....
- 4 अपणो कूस थे आप उठायो।
जगत पाप धोयो बड़ो भारी । बागड़ी लोग....
- 5 कोणै - कोणै ऊं जयकारो आयो।
मसीआ आनंद करयो मन में भारी । बागड़ी लोग....

भजन - 8

में वारी जाऊं यीसू नै
जग में घणां करया चमत्कार

- 1 नाम है साचो धन्य कहो रे
भूलो ना बांगा उपकार । में वारी....
- 2 बो ही धर्म गो साचो सेवक कुहावै
सब नै करावै बिसवास । में वारी....
- 3 करुणा, दया गो प्रभु मुकुट बांधै
सांसां गी करे बो सम्भाल । में वारी....

- 4 पापी जगत नै तारण आयौ
यीसू ईस्वर गो प्यारो लाल । में वारी....
- 5 छोटा-मोटा हर कोई मानै
मसीआ निवण करै बारम्बार । में वारी....

भजन - 9

देखो लीला रे

सांवरिय गी भाईयो अजब निराली- रे ।

- 1 प्रेम बाणी ऊं जगत बणायो, न्यारा- न्यारा फूल भरया
मिनखा नै रूप आप गो दिन्यो अजब निरालो रे । देखो....
- 2 ऊंचा- ऊंचा पहाड़ बणाया, गेहरी-गेहरी नदिया रे
अजब निरालो अम्बर रचियो, शोभा न्यारी रे । देखो....
- 3 सोनै बरगी काया रचदी, सुन्दर मूर्त बणाई रे
वारी दासां सांवरै नै सीस झुकाई रे । देखो....

भजन - 10

भाई छोड माया गो साथ संग कोनी जावै

ले जावै नरका माय, फेर पछतावै ।

- 1 के राजा के रंक, सब नै फसावै
अन्त समय गै माय छोड छिट कावै । भाई छोड....

- 2 भाई माया बादल गी छांव, ठेर नही पावै
माया गो कर ना गुमान, धरी रह जावै । भाई छोड....
- 3 भाई यीसू बचन है साचो धन, अन्त काम आवै
दास केवै मानो बात, सुरग ले जावै । भाई छोड....

भजन - 11

आज्यो चालां रे- आज्यो चालां रे
यीसू बचना में मिलगे सारा रे । आज्यो चालां....

- 1 गांव- गांव में आपां चाला, यीसू बचन सुणावां
यीसू मसी गी महिमा करगे, आपां सार बतावां
यीसू नाम है साचो -२
मिलगे सारा झोळी भरल्यो रे । आज्यो चालां....
- 2 एक दयालू है जगत में, साचो सिमरण करल्यो
एक पलक ना भूलो सारा, दिल में आही धरल्यो
करगे याद प्रभु नै-२
मन गा कारज पूरा करल्यो रे । आज्यो चालां....
- 3 पाखंडियां गै लारै हगे, क्यूं तू गोता खावै
मानो बचन थे यीसू गो थानै साची राह दिखावै,
सुरगा में ले जासी-२
मसिआ थानै साच बतावै रे । आज्यो चालां....

भजन - 12

भाई रे मार-मार मन मार, ना कर बुरा कर्म विचार
यीसू बड़ो दयालु आप, कर देवै सब गी नईया पार

- 1 जगत में पापी लोग घणोरा, जग गो सुख देवै घणो सार
चालै नरका गे मार्ग आप, सागै थानै भी ले जाय ।
भाई रे....
- 2 बाता यीसू मसी गी मान, ना कर जग गा भोग विचार
बाता यीसू मसी गी साच, सिर गो मुकुट है गळ गो हार ।
भाई रे....
- 3 ईसवर भरी जवानी भूल्यो, देख्या जग गा रंग अपार
तेरी जग ऊं जवानी जासी जग में रेसि सिरजन हार ।
भाई रे....
- 4 भाई रे सतगुरु सरण है साच, गावै कथ गे मसिआ बात
यीसू जगत गी जोती आप, मेटै जगत काळ अंधकार ।
भाई रे....

भजन - 13

तर्ज.....पीळो

अरज सुणो थे यीसू, अरज सुणो थे
मनडै ऊं याद करां म्हे यीसू प्यारा ओ
अरज सुणो थे....

- 1 नैणा नींद ना यीसू अन-जल भावै
काया सुखी औ म्हारी सारी । यीसू प्यारा ओ....
- 2 ढळ गी आयु गी सीमा घास बराबर
प्रेम पाणी ऊं थे सींचो । यीसू प्यारा ओ....
- 3 में तो पुकारू थानै कान लगाओ
दयाल दया कर उबारो । यीसू प्यारा ओ....
- 4 गुजरया सुखा गा दिनड़ा, दुखड़ा ऊं भरीया
दास पुकारै बेगा आओ । यीसू प्यारा ओ....

भजन - 14

मान रे मन मायला, थानै साची बात बतावै रे
यीसू जगत में मोटो नाम है, थानै साची राह दिखावै रे ।

- 1 पाखंडिया नर फिरै जगत में, जाळ में अपणै फसावै रे
दे बिसवास थानै कूड़ कपट गो, नरकां माय ले जावै रे ।
मान रे....
- 2 है बिसवास भाई मोटो जगत में यीसू आप बतावै रे
कर बिसवास मना यीसू बचन गो, धीरज थानै बंधावै रे ।
मान रे....
- 3 एक पलक गुण गा ले मनवा, जीवन सफल हो जावै रे
बचन गाडी में चड मेरा मनवा, सुरगा माहीं ले जावै रे ।
मान रे....

- 4 करयो बिसवास पतरस यीसू बचन गो, गवाई आप बतावै रे
छोड चलयो बो जगत गी बाता, यीसू गो गुण गावै रे ।
मान रे....

भजन - 15

धन्य कहो बानै धन्य कहो ऐ
नाम पवितर भारी,
एक घडी ना भूलो संईया सारी, प्रभु आप बड़ो बलकारी ।

- 1 मसी गी देही उधार मेरा मनवा,
दया कदे ना बिसारी
बो ही तो तैरै पापा नै मन करसी,
दुख माही आय छुडासी । धन्य कहो....
- 2 थारे तो जीवन गो साचो साथी यीसू,
करुणां, दया गो मुकुट बांध सी
थानै बो आपगी गोद बिठागे,
मेवा खूब खिलासी । धन्य कहो....
- 3 दीन गो दयाल प्रभु धर्म गो न्यायी,
बड़ो दयालु हितकारी
यीसू आप दया गो है सागर,
दासीड़ा तो जावै बलिहारी । धन्य कहो....

भजन - 16

मेरो जीवन थारो है यीसूजी, थे ही आण उबारो रे
ना कोई जग में मेरो है प्रभुजी, थारो ही एक सहारो रे ।

- 1 अपनी मर्जी ऊं मैं ना चालूं मसीह गो चोळो धारयो रे
बीती बाता छोड़ चल्या अब सागो, कर लियो थारो रे ।
मेरो जीवन....
- 2 दीन भगत हूं थारो औ यीसूजी, तन-मन धन करयो वारो रे
अपणो क्रूस में आप उठायो, थे ही राखो सहारो रे ।
मेरो जीवन....
- 3 पाखंडिया संग फिर-फिर गे में, रेयो प्रभु ऊं न्यारो रे
सुणयो बचन जद थारो औ यीसूजी, आय बतिस्मो धारयो रे ।
मेरो जीवन....
- 4 कोटी-कोटी प्रणाम करूं थानै, मेरो जीवन है थारो रे
दास कैवै गुण कदे ना भुलूं, पल भर नाही बिसारु रे ।
मेरो जीवन....

भजन - 17

जकई गो भाग रे घणो, यीसू आविया
ज्यांरी प्रेम ऊं करी मनवार, यीसू जी घर आविया

- 1 जकई हो एक तो मोटो धनवान कैवै
बानै यीसू जी देखण रो डाडो कोड । यीसू जी....

- 2 जकई हो आप तो देही गो छोटी बावनो
बो तो भीड़ रे कारणीय नाही देख । यीसू जी....
- 3 जकई रे मनडे उपड़ी एक बातइली
बो तो चढियो गुलरिय गी नोक । यीसू जी....
- 4 निकलिया नेडै ऊं यीसू जी जद देखियो
जकई नै दिन्यो रे हुकम नीचो आय । यीसू जी....
- 5 जकई नै केवै रे यीसू जी सुण बातइली
में तो थारै रे आंगणीय रेवां आज । यीसू जी....
- 6 लोगा नै भोत रे अचम्भो होयो देख गे
पापी आदमी घर आया यीसू आप । यीसू जी....
- 7 जकई हाथ रे जोड़या अर बोलिया
दीनां नै माल रे खजानो दियो बांट । यीसू जी....
- 8 यीसू जी देख गे जकई नै आसिस दियो
थारै घर माई आयो रे ऊधार । यीसू जी....

भजन - 18

यीसू है म्हारो साचो चरवाहो, दुख माही बोही संभाल करै ।

1 बो तो म्हानै हरी घास पै बीठावै, सुखदाई झरणे तले-२

धर्म पंथ पर आप खड़यो बो, म्हारी अगुवाई करे ।
यीसू है म्हारो....

2 चाहे में घोर अंधकार भरी, भीड़ में होंगे चालूं -२
तो भी कष्ट में ना डरू, यीसू आप ही पार करै ।
यीसू है म्हारो....

3 म्हानै सतावै प्रभु बांगे आगै, तू मेरी सेज करै -२
तू ही बिठावै म्हानै ऊंचे सिंहासन, माथे पर मुकूट धरै ।
यीसू है म्हारो....

4 तेरी भलाई और करुणा हरदम साथ रेवै
थारी दया है अपरम्पारा सेवक निवण करै ।
यीसू है म्हारो....

भजन - 19

अपणी देही नै भाई जीवित पवितर
ईसवर नै भावंतो चढाओ रे
ईसवर आप दया गो सागर भूल्यो रूप चेतावो रे ।

- 1 ई जगत गो रूप बणो ना, मनड़े गी चाल सुधारो रे
फेर प्रभु गी भली भावना, हिये में आप सुणीज्यो रे ।
अपणी देही....
- 2 अपणै आप नै दुजे उं ही, बढ़कर नाही जाणो रे
ईसवर आप बांटयो थानै हद, बिनै ही मानै चलीज्यो रे ।
अपणी देही....
- 3 मसी पवितर देह आपणी, हर कोई जन बांगो अंग है रे
न्यारा न्यारा बरदान दिया बण, प्रगट करगे दिखाज्यो रे ।
अपणी देही...
- 4 आपस में प्रेम करो नर सबसे, विस्मय-बिकार मिटाओ रे
आसा रूप में बण्या रेवो थे, रोज प्रार्थना करिज्यो रे ।
अपणी देही....
- 5 थानै सतावै बानै आसिस देवौ थे, रोवै बांगै सागै रोवो रे
मनड़ो सारा उं एक कर राखो, सारा उं संगती करीज्यो रे ।
अपणी देही...
- 6 अपणै हियै में भाई बेर भावना बेरी उं ना राखो रे
भूखों होवै तो बानै भोजन दिज्यो, प्यासै नै पाणी पिलाज्यो ।
अपणी देही....
- 7 सतगुरु यीसू थारी सरण में, सीस झूकयो है मेरो रे
दास केवै प्रभू करगे दया थे, सिर पर हात धरिज्यो रे ।
अपणी देही....

भजन - 20

आओ यीसू आओ दास याद करै
थारी गावै स्तुती महिमा करै ।

- 1 पेला चेला नै यीसू धीर बंधायो
किसती पे बैठ उपदेस बतायो
फेको जाळ पतरस मछली फसै । आओ यीसू....
- 2 ऐसो देख चेला मगन होय मन
फेक जाळ यीसू नमन करै
पकड़ी मछली चेला नाव भरै । आओ यीसू....
- 3 देख यीसू गी लीला पतरस केवै
डूबत नाव देख चरणा पडे
आज ऊं पतरस मिनख जिन्दा करै । आओ यीसू....
- 4 पतरस थारी प्रभु महिमा करै रे
थारी करणी गी प्रभु साख भरै,
मसीआ मान बडाई थारै चरणां धरै । आओ यीसू....

भजन - 21

औ प्रभु तेरी लीला है अनंत अपार ।

- 1 मनडै तेरै बात उपड़ी ,रच्ची धरण नै आय - २
माटी ऊं थे आदम रचियो, दियो थे सारो मान । प्रभु तेरी....

- 2 मिनख तारण तू जग में आयो, धरयो यीसू गो नाम - २
राजा रंक नै राह दिखायो, मेटयो सारा गो अंहकार । प्रभु तेरी....
- 3 जगत गो दुखड़ो मेटण खातर, चढयो क्रूस पर आप - २
तीन दिनां ऊं जिन्दा होयो, जग में होयो चमत्कार । प्रभु तेरी....
- 4 विस्व चराचर में तू व्यापक, थारी अदभूत सान - २
मसीआ थारै चरणां गा चाकर,आय लेवो अब त्यार । प्रभु तेरी....

भजन - 22

यीसू जी म्हारा देवा गा थे देव
जयकारो थारो, आत्मा बोले ।

- 1 आंधा नै आंख, पांव पंगला नै
मुर्दा नै जिन्दा करावै
आत्मा ऊं थारै बचना में चालै।
सुरगा गो राह दिखावै । यीसू जी....
- 2 ओखी घड़ी में जे कोई ध्यावै
करगे प्रार्थना आंनद पावै
नाचै-झूमै खुसी में सारा
हालेलुईया गावै । यीसू जी....
- 3 थारी मर्जी ऊं आस म्हें पूरा
रोज गी रोटी दिरावै,
यीसु म्हारो साचो चरवाहो
कदे ना भूखो सुणावै । यीसू जी....

- 4 यीसु है म्हारो मुक्ति गो सागर
सुरगा गो आसिस दिरावै,
मसीआ थारी पवितर आत्मा ऊं,
स्यांति भजन सुणावै । यीसू जी....

भजन - 23

यीसू म्हे पापी थे दयालु घणा
म्हारा पाप मिटाओ, मसी म्हारा ।

- 1 यीसू अर्ज करा म्हे थानै घणी
म्हारा दुख थे मिटाओ मसी म्हारा । यीसू म्हे....
- 2 यीसू आंधला ओर लंगडा आया घणां
थे हाथ लगा गे चंगा करया । यीसू म्हे....
- 3 थे मार्ग बतायो थारी रीत भली
म्हानै बचन सुणाया, मसी म्हारा । यीसू म्हे....
- 4 यीसू बंदगी करा दिन-रात घणी
म्हारी अरज सुणो थे, सुरगा रा धणी । यीसू म्हे....

भजन - 24

यीसू आयो रे
जग में दुनिया गो पाप मिटायो रे । यीसू....

- 1 देख पाप गो राज दयालु, मन ही मन दुख पायो रे - २
भेज्यो बाण यीसू धरणी पर, सुखडो छायो रे । यीसू आयो रे....
- 2 छोड बचन गो बाण दयालु, पाप गो मुखडो मोड़यो - २
नरका गो मार्ग तोड सदा, सुरगा नै जोडयो रे । यीसू आयो रे....
- 3 पापी उबारण खातर यीसू, ईं दूनिया में आयो रे - २
दे ललकार चढयो कुस, मरियम गो जायो रे । यीसू आयो रे....
- 4 भूल्या-भूल्या फिरया जगत में, सब जगह दुखड़ो पायो रे - २
दास बचन नै मान सदा, यीसू गुण गायो रे । यीसू आयो रे....

भजन - 25

आत्मा सुरगा री वासी

साची बात बता दे आत्मा, यीसू कद आसी ।

- 1 थे बतायो म्हानै बचन यीसू जी, माना थारी बात
सारै देश में फेलाऊं कलिसियो, करगे बचन प्रचार । आत्मा....
- 2 बचना गी राह पर चलकर आवै, नरका में जावै नाय
जिन पर थारो आसरो यीसू जी, बानै डर कोई नाय । आत्मा....
- 3 मन गा मेल धूपै रे बचन ऊं, होवै आत्म प्रकास ।
दोड़या थारै बचना में चाला, मिलै सुरगा गो वास । आत्मा....
- ४ कोणै-कोणै में थारा बचन सुणावा, महिमा करा म्हें अपार
मसीआ थारा बचन उतारै, हरदम करगे ध्यान । आत्मा....

भजन - 26

यीसू गो दरबार रे, म्हानै प्यारो घणो लागै
प्यारो लागै, म्हानै मीठो घणो लागै । यीसू....

- 1 पांगळा नै प्रभु पगलिया देवै
आंधला नै प्रभु आंखा देवै
सब नै करावै बिसवास रे । म्हाने....
- 2 कोढिया गो परभु कोढ मिटावै
बाझिया घर पुत्र खिडावै,
खुसिया देवै घणी सार रे । म्हाने....
- 3 पापीयां गो परभु पाप मिटावै
डूबता नै प्रभु आण उबारै
आया नै देवै बे प्यार रे । म्हाने....
- 4 यीसू जी गी शरण में जे कोई आवै
हंसी-खुशी ऊं सुरगां में जावै
आच्छो समय है विचार रे । म्हाने....

भजन - 27

यीसू चाल्यो रे सामरिया अर गलील कानी रे
यीसू चाल्यो....

- 1 बीच रास्ते सामरिया में, कोठी बानै मिल्या रे
देख कोढिया गो हाल बुरो, दिल यीसू भरियो रे ।
यीसू चाल्यो....

- 2 देख यीसू नै बै किरलावै, आच्छा म्हानै कर दयो रे
यीसू जी बानै धीर भंदा गे चंगा करिया रे ।
यीसू चाल्यो....
- 3 यीसू बानै हुकम दियो, थे जाओ आपणै गाम नै
ईसवर दया करी थारै पर, महिमा करियो रे ।
यीसू चाल्यो....
- 4 दस कोठी ऊं एक कोठी, मुड़गे पाछो आयो रे
आय यीसू नै निवण करयो, चरणां माही पड़ियो रे ।
यीसू चाल्यो....
- 5 यीसू जी जद बोलण लाग्या, सुण ले तूं प्रदेसी रे
मोटो हो बिसवास थारो, जद कारज सरीयो रे ।
यीसू चाल्यो....

भजन - 28

एक बार आओ जी यीसू जी म्हारे आंगणै
थारा दास जोवै रे थारी बाट, यीसू जी म्हारा लाडला

- 1 राजा गा थे राजा यीसू, देवा गा थे देव
थारा गुण गावै धरती आसमान । यीसू....
- 2 दीन गो दयाल तू, जग गो प्रतिपाल तु
थारी होवै जय- जयकार । यीसू....

- 3 चांद- सूरज महिमा गावै, यीसू थारै नाम गी
थे दियो बचन जद आय । यीसू....
- 4 धरणी उपर आय प्रभु, करयो है परउपकार थे ॥
थे मेटयो काळ अंधकार । यीसू....
- 5 आत्मा ऊं चाल्या सारा, बचना माहि थारै म्हें
झूमै खुसी में मसीआ आप । यीसू....

भजन - 29

उग्यो भाण होयो उजियालो
यीसू राजा जन्म लियो
पीर पेगम्बर नवी आविया
यीसू गो सत्कार करयो । उग्यो....

- 1 देश- देश गा नवी चाल्या, तारा गो निसान लियो
बेतलहम में आय पोंचीया, यीसू नै बा नमन करयो ॥
उग्यो....
- 2 अपणै राज गा नवी बुलागे, हेरोदेस बानै हुकम दियो
किसै देस में बो राजा जन्मयो, बांगो म्हानै समचार देवो ॥
उग्यो....
- 3 सुरगा ऊं एक दूत उतरीयो, नविया नै फरमान दियो
परमपिता गो बो पुत्र कहिजे, बागो ठिकाणो नाही देवो ॥
उग्यो....

- 4 सोने - चांदी लूबान चढाया, माया गो भण्डार भरयो
यीसू राजा ई दुनिया में, पापी गो उदार करयो ॥
उग्यो....

भजन - 30

ऐ साथिड़ा करो तैयार मन आंगणो
दीयो बचन प्रभु जी आय
साथी रे दियो मार्ग सुरग धाम रो ।

- 1 भवंरा लावै कीट जद जाय गे
देवै बचन गुंजार बानै लाय साथी रे,
ले जावै अपणै मार्गा रे ।
- 2 साथिड़ा, यीसू बतायो बो मारगा
हो जाओ थे तैयार भाई रे,
यीसू ले जावै अपणै साथ में रे ।
- 3 साथी रे ना मानै यीसू बात नै
फेर होवै आत्मा गी हाण
भाई रे जाय नरक में वास पड़े रे ।
- 4 साथि रे - नरक कुण्ड अंधकार है
बठै होवै जीव दुखीयार भाई रे
बच्यो समय थे बिचार ल्यो रे ।
- 5 साथि रे- अब तो मान यीसू गी बात नै
कर पवितर बचन गो ध्यान भाई रे
मिलै आत्म प्रकास में रे ।

6 गावें मसीआ महिमा यीसू नाम गी
सुण ल्यो ध्यान लगाय भाई रे
मगन होवो मन आप में रे ।

भजन - 31

तर्ज.....गुरु समान दाता

जग गै कल्याण खातर,यीसू आया जहान में
बचना गी बाळद ल्याया,खोली बा मैदान में ।

- 1 बचनां गी बाळद खोली,मांगी रे झीकां नै तोली।
लेई बांगां कारज सरिया,पोंचिया मुकाम में ।
- 2 दीन पर दया राखी, रेया ना गुमान में।
सतगुरु यिसू मोटो,नाम राखो ध्यान में ।
- 3 ऊंच नीच गो सतगुरु, भेद करयो ना।
रोया बागां आंसु धोया,राख्या बां समान में ।
- 4 पापी गो ऊध्दार करणै, जग माहीं आया यीसू ।
चढीया क्रूस यीसू, अमर होया जहान में ।

भजन - 32

तर्ज.....बेगो टोर ऊंट गाडो

आज्यो चालां सुरगां नै हाला ,ना कर दासिडा मोड़ो ।
आपां चालां रे यिसू गै द्वारै, त्यार कर ले मंनड़ो ।

- 1 यीसू मसी है बड़ो आप दयालु रे,
नाम है मोटो सब है रखवाळो रे ।
यीसू मानै आप गो जाणै, करे ना जग गो संगड़ो ।
आपां चालां....
- 2 यीसू करया है जग में काम भलेरा रे,
करया है जग गा सारा दूर अंधेरा रे ।
बांगी माया गो पार नहीं पायो,मेट्यो सब गो दुखड़ो ।
आपां चालां....
- 3 यीसू है आप मोटो परउपकारी रे, मांगै सो देवै ऐसो है दातारी रे ।
प्रभु सब गो दाता ह मोटो, ना मन में राखो थे झगड़ो ।
आपां चालां....
- 4 सतगुरु यिसू आप सार बताई रे, ज्यांरी तो महिमा मसिआ सुणाई रे।
ओ नित करीयो थे महिमा ईसवर गी, खोलो दिल गो पटड़ो ।
आपां चालां....

भजन - 33

लाजरीयो भाज्यो जावै ऐ
सूत्यो च्यार दिनां ऊं गेहरी नींद,यीसू जद आप उठावै रे ।

- 1 होए उदासी अपनै मन, कब्रों पे चलकर आय ।
रख्यो कब्र पर पत्थर नै बो के गे दूर हटाए,
लाजर गी भेना बोली ऐ,
आ तो च्यार दिनां गी पडी लोथ,लोथ अब बांसण लागी ऐ ।
लाजरीयो भाज्यो....
- 2 बोल्यां यीसू जी सूण ऐ मारथा राखो थे बिसवास
महिमा देखो आज प्रभु गी, देवो पत्थर नै हटाए,
यिसू जद आप बोलिया ऐ,
सुणो आज पूकार म्हारी आय,प्रभु तेरो होवै नित धन्यवाद ।
लाजरीयो भाज्यो....
- 3 आंख उठागे बोल्या यिसू,सूण लाजर म्हारी बात।
भोत सोयो तुं घोर निंद में ,अब तो बेटा जाग,
निकळ आयो सुण गे यिसू गी बात,
होयो सब नै घणो चमत्कार,लाजर जद जिंदा होयो रे ।
लाजरीयो भाज्यो....

भजन - 34

धन धन यिसू नाम तुम्हारो, करयो जगत पर परउपकारो - २

- 1 धन्य पिता थारा धन्य माता,पापी नै बचाण खातर आया यिसू दाता
आय धरती पर करीया वासा, होया सेतान देख बहुत उदासा ।
- 2 थे ही महान मेरा सतगुरु स्वामी, हर घट गा हो थे ही ग्याता
थे ही पतित पावन पवितर, हर घट माहीं थे करो उजासा ।

- 3 थे ही दया गा सागर भरीया, सब गी बुझाओ थे ही प्यासा
थे किरपाल मेरा सतगुरू यीसू,म्हानै है प्रभू थारी आसा ।
- 4 ऐसो नाम सदा दिल राखो, मन ऊं करो थे नित अरदासा
दास केवै कुछ ओर नहि मांगा, हरदम रेवो नित म्हारे पासा ।

भजन - 35

मेरो यीसू राजा बादळ ऊपर बेगो आवैलो
हालेलूईया बोलो यीसू बेगो आवैलो । मेरो यीसू....

- 1 पतरस बरगो चेलो यीसू पाणी पर चलायो
चार दिनां गो मूर्दा लाजर हेलो मार जगायो । मेरो यीसू....
- 2 जिदंगी गो पाणी मनै यीसू पिलावै लो
रूह मेरै गी यीसू राजा प्यास बुजावैलो । मेरो यीसू....
- 3 आसमानी खुसियां मनै यीसू देवैलो
कमजोर दिल नै मजबूत बणावैगो । मेरो यीसू....

भजन - 36

बाबो म्हारो यीसू नासरी
बाबो म्हारो यीसू नासरी ।

- 1 में दर यीसू गै जाणो, चरणा में सीस झुकाणो
बो है सुरग गो राजा, बो है मुक्ति गो दाता ।

- 2 जो धरती ऊपर बांधै बो सुरग में बंध जावै
जो धरती ऊपर खोलै, बो सुरग में खुल जावै ।
- 3 जोड़ो सुरग माही धन नै, कदी चोर वी नही चुरावै
बठै ना लागै लो कीड़ो, जंगाळ भी ना खावै ।

भजन - 37

मीठी लागै यीसू जी थारी बाणी - २

- 1 मीठी लागै अमरत वाणी, मीठी लागै वाणी । मीठी लागै....
- 2 यीसू तो म्हारी जिंदगी गी रोटि, खा'गे जिंदगी पाणी । मीठी लागै....
- 3 यीसू तो म्हारो जिंदगी गो पाणी, रू गी प्यास भूजाणी । मीठी लागै....
- 4 यीसू तो म्हारो सुरगा गो राजा, यीसू सागै संगती पाणी । मीठी लागै....
- 5 यीसू तो म्हारो मुक्ती दाता, यीसू कनू मुक्ती पाणी । मीठी लागै....

भजन - 38

यीसू जी प्यारा अरज सुणो म्हारी, थानै करां अरज बारम्बार
यीसू जी अरज सुणो म्हारी ।

- 1 यीसू राजा म्हें पापी हां, पाप कमायो बेसुमार
करो दया यीसू म्हानै उबारो, करयो हिय नै त्यार ।

- 2 दर-दर गी ठोकर खाई, भूल गयो थारी राह
भूलेड़ा नै राह दिखागे,म्हानै मंजला देवो पुगाय ।
- 3 ऊंच निच गै भेद माहि, रेयो उम गमाय
सुणयो बचन थारो दोड़यो आयो, लेवो हिय ऊ लगाय ।

भजन - 39

यीसू पर कर बिसवास, साच बतावै रे
मान चालै बांगी बात, पार लंघावै रे ।

- 1 थोड़ा दिना गी अठै रेण,फेर तूं जावै रे
काया -माया गो ना कर मान,खाक मिल जावै रे । यीसू पर....
- 2 माया बादल गी छांव, ठोड़ नाहीं पावै रे
जियां आवै घास पर ओस,पल में उड जावै रे । यीसू पर....
- 3 काया माया गो बंदा खेल,धरयो ही रे जावै रे
बचन जावै लो थारै साथ, मसिआ बतावै रे । यीसू पर....

भजन - 40

आयो है भाई आयो है, खुदा गो बंदो आयो है
दुनिया गा दुख दूर करै बो, यीसू मसी कुहायो है ।

- 1 किस्ती पर चढगे सतगुरु यीसू, दूर देसां ऊं आयो रे
दुष्ट आत्मा दूर ऊं आ गे, चरणा में सीस झुकायो रे ।

- 2 प्रेत आत्मा यूं उठ बोली, दुख देवण क्यूं आयो रे
समय ऊं पैलां आ गे, म्हानै कियां थे सतायो रे ।
- 3 यीसू जी बानै पुछण लागया, कै नाम है थारो रे
प्रेत आत्मा केवण लागी, पळटण नाम है म्हारो रे ।
- 4 यीसू बानै हुकम दियो थे, छोड जाओ इंगो सागो रे
प्रेत आत्मा रोवण लागी, सुरां में जाण दयो म्हानै रे ।
- 5 यीसू बानै चंगा करया, जद महिमा करी बण भारी रे
धन धन रे ईस्वर गा लाला, सूनली अर्ज हमारी रे ।

भजन - 41

धन्यवाद करो प्रभु गो, बो जग सिरजनहार
प्रभु गी दया है सदां गी, बो सब गो रखवाळ ।

- 1 धन्यवाद करो प्रभु गो, बो सब गो है किरतार
बिंगा इचरज भरया है कारज, जा नै पूज रहयो संसार ।
- 2 धन्यवाद करो प्रभु गो, बण रचियो धरण अकास
स्वरूप में आदम रचियो, बीनै दियो धरण गो राज ।
- 3 धन्यवाद करो प्रभु गो, बो जग गो पालनहार
बो मिनख देहि नै धरगे, जीवा गो करयो उद्धार ।
- 4 धन्यवाद करो प्रभु गो, बो पल में सूनै पूकार
मसिआ बणगे सेवक, थारी महिमा करै अपार ।

भजन - 42

बेगा- बेगा आओ प्यारा यीसू जी म्हारा
म्हे हां थारा दास यीसू, ना तरसाओ प्यारा ।

- 1 जद म्हे देखां आकास माही, सुनसान दिखै सारा
बणगे जोत सामणै आओ, द्यो दरसन प्यारा ।
- 2 करां आस म्हे थारै आवण गी, दिन बीतै म्हारा
कंचन काया सूकि होगी, याद करै सारा ।
- 3 दास बणागे राज म्हानै देग्या, करया है उपकारा
आय सम्भाळो आप मसीआ, त्यार देवो सारा ।

भजन - 43

चालै चालै रे

यीसू गी राह, मसीह गी राह, यीसू जद साख भरै ।

- 1 यीसू गी दया भारी जगत में, मनड़ो तूं समझाय
यीसू है म्हारो रेन बसेरो, देवै जीवन गो अराम ।
यीसू जद....
- 2 यीसू मसी है साचो रूखाळो, कोई घटी ना होय
जीवन गी इच्छा पूरी करै बो, कमी रेवै ना कोय ।
यीसू जद....

- 3 यीसू गो मारग साचो सदां है, बचन बतावै थानै ओय
मानै अपणो सूरगा गे माही, मान चले कोय ।
यीसू जद....
- 4 जीवन गी चिन्ता दूर होवै, बचना में सूर होय
बडो दयालु यीसू है म्हारो, आप सम्भाळै सोय ।
यीसू जद....

भजन - 44

कुए पर यीसू जा बेठया ,एक औरत आई सामरिया
ओरत आई सामरिया, बिंगै सिर पे धरी एक गागरिया ।
कुए....

- 1 बोलै सामरिया तूं जात यहूदि है, में नीची जात हू सामरिया
म्हारी तो जात यीसू औच्छि कहिजै, पाणी पिलाउ कीया सामरिया ।
कुए....
- 2 तूं उंच नीच गो भेद ना राखो, बोलुं पिला दे पाणी आय
तूं मांगै थानै सब कुछ देऊँ, अन्नत जीवन गो पाणी प्याय ।
कुए....
- 3 प्रदेसी सुण बोले रे सामरिया, भोत गेरो ओ जल गो खाड
पास तैरै कछु है भी नाहि, अन्नत जीवन जल कहा ऊं आय ।
कुए....
- 4 बोलै यीसू सुण सामरिया,तूं म्हारी बात ध्यान लगाय
इं पाणी उँ प्यास ना जावै, अन्नत जीवन जळ प्यास बूझाय ।
कुए....

5 कर दी दया बण आप सांवरिय, उँच नीच गो भेद मिटाय
मोटो हो बिसवास हिय जद, प्रभु लिन्या बिनै हाथ उठाय ।
कुए....

भजन - 45

यीसू मसी ओ म्हारा यीसू मसी
थानै याद करै दुनियां तो घणी
बेगा पधारो म्हारा यीसू मसी ।

- 1 सुरगा ऊँ एक दुत उतारयो, माता मरियम नै समझायो
आय धरणी पर थे तो जन्म लियो ।
- 2 ऊँच निच गो भेद मिटायो, आत्मा गो प्रकास करायो
त्यारो सारां नै , थारी महिमा घणी ।
- 3 दूखियां गो थे बंधन छुडायो, अधंकार गो राज मिटायो
थारी होवै प्रसंसा, स्तूति घणी ।
- 4 क्रूस पर थानै दूस्टां चढायो, कांटां गो ताज थारै सिर पहरायो
जग में नाम बडो, थारी महिमा घणी ।
- 5 यीसू महादाता जग में कुहायो, पाप ऊँ म्हारो बंधन छुडायो
दास पवितर आत्मा ऊँ महिमा करी ।

भजन - 46

देख अधरमी जग नै पिता परमेसर दाता
अपणै हिय में विचार कियो ।

- 1 केवै दुत सुण माता मरियम राणी
ईसवर थारो जग में ध्यान करयो ।
- 2 थारै गर्भ ऊँ एक बालको जलमें माता ।
आय पापिड़ा नै त्यार सी,
सुणगे दुतां गी बाता माता मरियम राणी,
अपणै मनड़ै में विचार करयो ।
- 3 माता मरियम गो मनड़ो, खुसिया ऊँ भरीयो,
जद सुरगा गो समाचार सुण्यो,
माता मरियम दोनू हात जोड़या रे साथी,
ईसवर गो धन्यवाद करयो ।
- 4 अपणी मरजी ऊँ ईसवर, हुकम करयो रे साथी
आय यीसू धरणी जन्म लियो,
देख ईसवर गी लीला, माता मरियम राणी,
मनड़ै ऊँ ईसवर गो धन्यवाद करयो ।
- 5 गावै धरणी पर मंगला चारू दिसा रे साथी
यीसू धरणी पर चमत्कार करयो,
धन्य ईसवर गा बेटा, यीसू मसी म्हारा,
प्रेम दीपक प्रकास करयो ।

भजन - 47

म्हे तो आया थारै दरबार
यीसू जी म्हानै माफ करो ।

- 1 म्हानै बंचावण खुदा थै आया
क्रूस उठायो कोडा खाया
करयो पापा ऊं बचणै गो प्रचार ।
- 2 कांटा गो थानै ताज पहरायो
क्रूस बणाके बीं पर लिटायो
किलां ठोक गे सतायो संसार ।
- 3 म्हारी खातिर थै प्रभुजी
ई दुनियां में आया
खुदा ऊं मिलण गो दियो अधिकार ।
- 4 सारै जगत गा थे रचियता
थारै बचन ऊं सगळा बचता
जद मान्यो थानै करतार ।

भजन - 48

म्हारै दिल में थारो नाम
म्हारै मन में थारो नाम
जीवन में यीसू थारो ही नाम
थारो ही नाम जीवन यीसू थारो ही नाम ।

- 1 म्हारै खातिर थै प्रभु ई धरती पे आया
 क्रूस पे आपणो खून बहागे पापा ऊं बचाया
 थै दियो ओ बलिदान
 जीवन में यीसू थारो ही नाम
 थारो ही नाम जीवन यीसू थारो ही नाम ।
- 2 दर दर भटक्या म्हे प्रभु अब थारै दर आया
 थारै दर आगे प्रभु थानै सीस नीभाया
 थै बक्सयो जीवन दान
 जीवन में यीसू थारो ही नाम
 थारो ही नाम जीवन यीसू थारो ही नाम ।
- 3 ई दिल में हे प्रभु कोई नाम नै आवै
 थै बक्सी म्हानै जिन्दगी, करां म्हे थारी बन्दगी
 थै दाता यीसू महान
 जीवन में यीसू थारो ही नाम
 थारो ही नाम जीवन यीसू थारो ही नाम ।

भजन - 49

बणावण आळा थै ही हो, ढावण आळो थै ही हो
 थै ही हो पालणहार, थारै बिन और नहीं ।

- 1 आकास बणाया धरती बणायी, बणायी सारी जहान
 माटी ऊं थे रचियो आदम, दिन्यो सगळो मान ।
 थारै बिना और नहीं....

- 2 आदम वाटी गो फळ खा गे, बो बणियो आप अग्यान
पापा ऊं बो पूरो भर ग्यो, भुगत्यो सारी जहान ।
थारै बिना और नहीं....
- 3 पापा ऊं थारो क्रोध भड़कग्यो, मेह ऊं ऊजाड़ी जहान
नूह घरानै पे किरपा करदी, थै हो करता महान ।
थारै बिना और नहीं....
- 4 यीसू बणगे जग में आया, क्रूस उठागे कोड़ा खाया
सूळी पर थै जान दिन्ही, रूठै खुदा ऊं मिलाया ।
थारै बिना और नहीं....

भजन - 50

नाम जप नाम यीसू नाम जप नाम ।

- 1 तेरी काया माही घोर अंधेरो
यीसू आप करै गो सवेरो । नाम....
- 2 न्याय करैगो आप बो पूरा
धर्मी बणगे रेवो सूर। नाम....
- 3 ना बो नेड़ा, ना बो दुरा
घट-घट माही है भर पूरा । नाम....
- 4 यीसू मसी है प्रभु म्हारा
सुण ल्यो ध्यान लगा गे सारा । नाम....

भजन - 51

आप धणी सुरगा गो राजा

म्हें हां दास तूं बेगो आज्या, अर्जी सुण ले रे (२)

मसीआ थानै याद करै आज्या रे, यीसू दरसन दे-दे रे ।

- 1 सुरग छोड़ धरती पर आयो, ऐसो पर परउपकारी
कूस पर आ गे खून बहायो ऐसौ है करतारी
ईसवर गा थे लाल दुलारा, जग में थारी महिमा भारी ।
दरसन दे-दे रे....
- 2 आंधा, लगडा ओर कोढिया, सब थारै बलिहारी
मुड़दा नै थे जिन्दा करिया, मानै सब संसारी
भरपूरी थे करी जीवन में, सुण ल्यो अर्जी आज हमारी ।
दरसन दे-दे रे....
- 3 बिछड़ेड़ा नै आप मिलाया, जय-जयकार तुम्हारी
जिन्दा बचन थे दियो जगत में, बाईबल सार बतारी,
बचन राह पर चाल पड़या म्हें, मसीआ मानी बात थारी ।
दरसन दे-दे रे....

भजन - 52

यीसू थारो नाम जगत में

थे ही दाता महान

- 1 चरणी माही जन्म लियो, जद बणिया मुक्त निसान
पापी गा पाप मिटावण खातर यीसू कूस पर होया बलिदान ।
यीसू थारो....

- 2 सुरगा गा थे वासी कहिजो थारी करणी अपरम्पार
सहारा बणिया दीन हीन गा प्रभु, मानै सब संसार ।
यीसू थारो....
- 3 अंधकार ऊं भरय जीवन में, प्रेम गो करयो प्रकास
पाप गै जाल नै तोड़ सदा ही, दियो, सुद्ध आत्मा गो वरदान ।
यीसू थारो....
- 4 दया करी थे थारी मिनख पर, बांटया बचन समान
थारै तो नाम गी महिमा खातर, यीसू जीवन है बलिदान ।
यीसू थारो....

भजन - 53

यीसू मसी गै बरगो जग में, ना कोई होसी होवै रे
रोवै झिकां गा आसू पोछै, पल माही धीर बंधावै ।

- 1 पतरस बरगै-चेलै नै बो पाणी पर चलावै रे
च्यार दिना ऊं मरियो, लाजर जिन्दा आप करावै रे ।
यीसू मसी गै बरगौ....
- 2 पापी ऊबारण खातर यीसू, क्रुस पर खून बहावै रे
तीन दिना ऊं जिन्दा होंगे, सुरग लोक माही जावै रे ।
यीसू मसी गै बरगौ....
- 3 प्रेम बड़ै इं जगत में, यीसू आप बतावै रे
पापण नार नै हिय लगागे, पाप ऊं मुक्त करावै रे ।
यीसू मसी गै बरगौ....

- 4 हे प्रभु तू महान जगत में, च्यार कूट नित गावै रे
सतगुरु यीसू थारी सरण में, मसिआ सीस निभावै रे ।
यीसू मसी गै बरगौ....

भजन - 54

करियो यीसू जी पापण गो कल्याण
जद मनडै उं प्रेम करयो ।

- 1 बोलै आप फरीसी आय, चालो नी, म्हारै आंगणै
म्हे जिमण जिमावा थानै आज, मनडै उं मनवार करां ।
करियो यीसू जी....
- 2 बेठया यीसू जी आगणिय आय, फरीसी बांगी सेवा करै
जद लागियो पापण नै विचार, बरतण माही सेंट ल्यावै ।
करियो यीसू जी....
- 3 पापण दौड़ी आई खड़ी यीसू लार, नैणा माही नीर भरै
धोवै चरण आंसूझा उं आप, केसा उं बानै साफ करै ।
करियो यीसू जी....
- 4 यीसू देख्यो रे पापण गो प्यार, मनडै में दया खूब करै
सिर पर धरियो करुणां गो हात, पापा गो बंधन दूर करै ।
करियो यीसू जी....

भजन - 55

प्रभु जग माही आप महान
देखो बांगी करुणा रे ।

- 1 ईसवर आप दया गो सागर
भेजियो आप गो लाल । देखो....
- 2 आपणी प्रजा गा दुखड़ा मेटण
जद कूस पर होया बलिदान । देखो....
- 3 बचना गी जोती देई जगत में
थर-थर कांपयो रे सेतान । देखो....
- 4 म्हारो प्रभु है प्रेम गो बूटो
सब नै देवै विसराम । देखो....

भजन - 56

यीसू जी आपणो सहारो, थे नाहि बिसारो
दूजो है नाही प्रभू हमारो, याद राखो दिन-रात ।

- 1 धन्य यीसू जी धन्य बांगो काम, जग गी कूटा में यीसू महान
आप बतावै जीवन गो सार, कर ल्यो पाप ऊं किनारो ।
थे नाहि बिसारो....

- 2 प्रभु प्रतापी बो सांती प्रधान, है बो पवितर जगत गो पालनहार
बांगी माया गो पायो नही पार, बातइली थे बांगी विचारो ।
थे नाहि बिसारो....
- 3 कोढिया नै चंगा आंधा ने देवै आंख, डूबता चेला नै त्यारा यीसू आप,
बांगी दया है अपरम्पार, दुखिया गो दुखड़ो निवारयो ।
थे नाहि बिसारो....
- 4 साचै जीवन गो बो आप है आधार, भूल्या जीवा गो करै बो उद्धार
मनड़ो सवारो सुणैगो पूकार, ऐसो है दयालु हमारो ।
थे नाहि बिसारो....

भजन - 57

अर्ज थानै आज करां म्हारा प्यारा यीसू
आवां चरणा में ।

- 1 सीस झुकागे थानै, करुं अरदास में
म्हे हा थारा दास प्रभु मानो म्हारी बात नै
ध्यान देवा ना जगत में । यीसू....
- 2 पापी जीवन म्हारो, दुखड़ा में डूब रेयो
डूबत नयीया प्रभु आप तू देख रेयो
देर करो ना आवण में । यीसू....
- 3 प्रभु महान तू ही, जग में समाय रेयो
धुटना टेक यीसू थानै में मनाय रेयो
जीवन करयो अर्पण में । यीसू....

- 4 म्हारी पूकार सुण, थानै मनाऊ में
थानै छोड दूजो, देव ना ध्याऊ में
लेल्यो थारी सरण में । यीसू....

भजन - 58

थानै मानै सब संसार, आयो मेरो नासरियो ।

- 1 सुरग छोड चरणी में आयो मेरो नासरियो
चढग्यो क्रूस पे दे ललकार । आयो मेरो....
- 2 बो ही जगत गी जोत है मेरो नासरियो
बो ही सब नै करावै प्रकास । आयो मेरो....
- 3 कर्ता जगत गो आप है मेरो नासरियो
बो ही जग गो पालणहार । आयो मेरो....
- 4 पापी नै तारण जग में आयो मेरो नासरियो
सब गै रेयो पवितर साथ । आयो मेरो....
- 5 ताळी बजाओ आज मनाओ मेरो नासरियो
बो तो सब गी सुणैगो अरदास । आयो मेरो....

भजन - 59

यीसू गो सिमरण साचो रे, कर ल्यो सारा आज
करल्यो सारा आज रे, सुरगा गी साची बात रे । यीसू गो....

- 1 साचै मन ऊं जे कोई ध्यावै चंगा करै आप,यीसू चंगा करै आप -२
दया गी पाट्टी बांध यीसू, संग धीर बंधावै साथ रे । यीसू गो....
- 2 देवा गो बो देव है यीसू, महिमा अपरम्पार,बांगी महिमा अपरम्पार -२
दीन दास गी ढाल बणै, सेतान गै घालै नाथ रे । यीसू गो....
- 3 प्रेम गो बादळ बण गो यीसू मेह बरसावै आय,प्रभु मेह बरसावै आय -२
सूखै जीवन नै हरयो करे, बो मरियम प्यारो लाल रे । यीसू गो....
- 4 बण गो साचा चेला मसीआ,नाम रटै दिन-रात,थारो नाम रटै दिन रात-२
हिवडै याद राखै नित थानै, सिर पे राखियो हात रे । यीसू गो....

भजन - 60

आज्या यीसू मनडै गी डाल, करो म्हारै हिवडै प्रकास ।

- 1 सुण रे यीसू मनडै गी बात, सूक गी काया गी पात
दूर करो मनडै गी रात, याद करू थानै दिन अर रात ।
आज्या यीसू मनडै गी....
- 2 थारै कुटम गो हुं में बाल, दया करो थे सिरजनहार
सिर पर धरीयो प्रेम गो हाथ, दुख संकट में देईयो साथ ।
आज्या यीसू मनडै गी....
- 3 थारै बचन गी पकड़ी चाल, म्हारो जीवन अब थारै लार
म्हारो जीवन गी है एक साच, थे हो सुर म्हारा म्हे हा ताल ।
आज्या यीसू मनडै गी....

- 4 सेवक बण यीसू करुं अरदास, थारै पे है म्हारो विस्वास
मान लिया थानै मायर बाप, पूरी करो जीवन गी आस ।
आज्या यीसू मनइ गी....

भजन - 61

मानै मानै यीसू गी बात
यीसू बांगै साथ रेवै ।

- 1 अनहोणी नै होणी कर देवे, ऐसो है करतार
सतगुरु यीसू आद अनदि, बांगी करणी अपरम्पार ।
यीसू बांगै साथ रेवै....
- 2 पतरस मानी बात यीसू गी, कारज सारया आय
च्यार दिना गो मरियो लाजर, आप उठायो बण जाय ।
यीसू बांगै साथ रेवै....
- 3 सतगुरु यीसू प्रेमी पिता है, नित हि राखै ध्यान
कोई घटी ना रेवै जीवन में, नित उठ जपै बांगो नाम ।
यीसू बांगै साथ रेवै....
- 4 देवै जीवन में भरपूरी बो यीसु नासरी आप
साचै मन ऊं जे कोई मानै, नईया तो कर दय परले पार ।
यीसू बांगै साथ रेवै....

भजन - 62

तर्ज...सुण ले बंशी वाले श्याम

- 1 यीसू गी बात बताऊँ, थानै गा गे कथा सूणाऊ
सुण ल्यो आवण गी बात, थानै बार बार समझाऊ ।
- 2 यीसू सारा नै भेळा करसि, बो मूळ ब्याज संग लेसी
सुण ल्यो थे नर ओर नार, सिर भार घणो ई पड़सि ।
यीसू गी बात....
- 3 जो चाल्या मसी में पूरा, बांगी साख बार बार भरसी
ना चाल्या मसी गै लार, बानै नरका गी सजा सूणासी ।
यीसू गी बात....
- 4 जद यीसू नासरी आसी, अधर्मी नै सजा सुणासी
धर्मी गो करगे न्याय, बो सुरगा गो सुख देसी ।
यीसू गी बात....
- 5 यीसू सुरगा गो वासी, बो त्यारण मसीआ आसी
सेतान गै मारगे लात, यीसू गोद उठा ले जासी ।
यीसू गी बात....

भजन - 63

तर्ज...सुगणा रा बीरा

मरियम गो प्यारो यीसू जग में महान है
सुरगाळो राजा थारो, यीसू मसी नाम है ।

- 1 आसमान ऊँ दूत उतर गे, मरियम नै समझावै
मरियम गो मन पड़ै फिकर में, सुण गे बा घबरावै,
थारै तो पेदा होवै, बो ईसवर गो लाल है । सुरगाळा राजा
- 2 यीसू गै दरसन दोड़यो, यूहना साधु आवै
यीसू मसी गा दरसण करगे, धन्य बो हो जावै,
जीवन सफल होयो, कटया बिंगा पाप है । सुरगाळा राजा
- 3 बारह साल गा होया यीसू, जद मंदिरिया में आवै
ग्यानिया नै बो ग्यान बता गे, सब गै मनड़ै भावै,
प्रभु गी महिमा मेरो जीवन अधार है । सुरगाळा राजा
- 4 यूहना ऊँ लियो बतिस्मो, बादळिओ गरणावै
बण गे कबूतर पवितर आत्मा, यीसू पर थम जावै,
गिगना ऊँ बाणी होवै, यीसू मेरो लाल है । सुरगाळा राजा

भजन - 64

तर्ज... मंगल

यीसू चढिया क्रूस पर आप, काळ पर जय करै
म्हारै पापा गै कारण, यीसू आप मरै ।

- 1 यीसू गेया बागा माय, प्रार्थना आप करै
प्रभु जी प्यालो देवै टाळ, नेणा माँहि नीर भरै । यीसू चढिया....
- 2 लोग रळ मिळ भेळा होय, चलै गै सागै आवै ।
लियो पकड़ यीसू जी नै आय, सभा माँहि ले जावै । यीसू चढिया....

- 3 परमपिता गो केगे लाल, लोग बानै ताना देवै
यीसू बेठया है आप मोन धार, जवाब बानै ना देवै । यीसू चढिया....
- 4 हाजिर करियो हाकिम गै जाय, प्रजा बां पर दोस देवै
बोल्यो प्रजा ऊँ हाकिम आप, दोस ईमें ना होवै । यीसू चढिया....
- 5 हाकिम पांणीड़ै गो कळस मंगाय, हाता नै हाकिम आप धोवै
ओ तो धर्मी पुरुस है आप, दोस मनै ना होवै । यीसू चढिया....

भजन - 65

तर्ज...चरखे गो भेद बताऊं

थानै क्रुस गी बात बताऊं रे, सुण ल्यो नर ओर नार ।

- 1 यीसू नै करगे हुकम क्रुस गो, पटकयो सभा गै माय-२
दुस्टां बानै मारया कोरडा, दिन्ही बां खाल उतार । थानै क्रुस गो....
- 2 ले क्रुस यीसू चाल पड़या जद, होया हाल बेहाल-२
धरै पांव पर चल नही पावै, देहि ऊं गया बे हार । थानै क्रुस गो....
- 3 जाय क्रुस पर पटक दियो, बांगै हाता में कील ठुकाय-२
ना कोई नेड़ै आवै यीसू गै, याद करै किरतार । थानै क्रुस गो....
- 4 करगे याद यीसू परमपिता नै, आत्मा सोंपै बांगै हात-२
पड़दो पाटयो मंदिरिय गो जद, जग में होयो अंधकार । थानै क्रुस गो....

भजन - 66

प्रभु मसी थे देव म्हारा, डूबत में थे त्यारण हारे
थे हो जग के आप सहारे, बेगा आओ थानै दास पुकारे ।

- 1 थारी महिमा अपरम्पारा, जग गा कर्ता पालनहारा
पापी उबारण जग में आया, भटक्या जीवा नै थे राह दिखाया ।
प्रभु मसी थे....
- 2 थे ही आदि अंत कुहावो, साचो बचन थारी साख भरावै
ईसवर गा थे लाल दुलारा, जग में जीव उबारण आया ।
प्रभु मसी थे....
- 3 नर-नारी थारो ध्यान धरत है, धरण आकास थारी महिमा करत है
थे ही दया गा सागर भरिया, पापी उबारण क्रुस पर चढिया ।
प्रभु मसी थे....
- 4 अटक्या काम यीसू आय सुधारो, अर्ज करु थे पल में पधारो
म्हारी नाव प्रभु भव मांही डोलै, बण गे खेवटिया पार उतारो ।
प्रभु मसी थे....

भजन - 67

यीसू रे म्हारै दिल में, थारी जोत जागी - २
करां म्हे दिन-रात बस थानै याद,
म्हारै दिल में थारी लगन लागी ।

1 प्रभु तू म्हारै खातर ई जग में आयो
अपणो खून बहा गे, तू म्हानै बचायो,
थारै हातां पेरं में कीलां लागी । यीसू रे....

2 प्रभु म्हे हा पापी ओर बेसहारा
म्हारै अंग-अंग में है प्रभु पाप समायो,
प्रभु म्हे हा नरका गा भागी । यीसू रे....

3 प्रभु थारै दर आया म्हे सुख पाया
थारी नाम गी महिमा म्हे गा के सुणावां,
थारै दर पे थारी महिमा गाई । यीसू रे....

भजन - 68

चार दिना गो अठै पावणो, आखिर पाछो जावैलो
चेत सकै तो चेत बावळा, फेर घणो पछतावैलो ।

1 बुलाएड़ा सारा लोग, चुणिया बांमें थोडा जी
चुणया होया नै यीसू राजा सजै पासै बिठावैलो । चेत सकै....

2 नदी किनारै लाग्यो बूंटो, सदा हरयो लहरावैलो
ना बिगां पता कुंमळावै, उपर फळ ले आवैलो । चेत सकै....

3 जो डाळी यीसू में फेलै, घणो फळ ले आवै है
नहीं तो भाई काट बाड गे, आग गै माई जलावैलो । चेत सकै....

4 यीसू मसी गो नाम सुमरले, बेड़ो पार लघावैलो लो
सुरग पालकी आप बिठागे, सत गी सेर करावैलो । चेत सकै....

भजन - 69

म्हारै दिल नै पाक बणादयो यीसू
कि ओर ना मांगू, जूल्मी नै भगत बणादयो कि ओर ना मांगू ।
म्हारै दिल नै - २

- 1 म्हे तो राखी थारै पर आस
यीसू किरपा करदयो ना जाऊं निरास
मनै अमृत पाणी पिलादयो कि और ना मांगू । म्हारै दिल नै - २
- 2 में चालती - (२) कठै थक ना जाऊं
थारै नाम में यीसू कठै अक ना जाऊं
जीवन गो रस्तो बतादयो कि और ना मांगू । म्हारै दिल नै - २
- 3 के करना में ऐ मैल माळिया
गिरजावैगा सारा गा सारा
मेरो सुरगा में घर बणादयो कि और ना मांगू । म्हारै दिल नै - २

भजन - 70

तर्ज.....बना रे बागा मै

यीसू जी थे ईं दूनिया में आया ओ - २
थे दूखिया नै-२, धीर बंधाया, म्हारा यीसू मसी ।

- 1 यीसू जी थे सूरग छोड जग आया ओ - २
थानै मरियम-२, लाड लडाया । म्हारा यीसू मसी....

- 2 यीसू जी थे बण गे घटा लहराया ओ - २
थे प्रेम गा-२, मेह बरसाया । म्हारा यीसू मसी....
- 3 यीसू जी थे ईस्वर लाल कूहाया ओ - २
पापी गा-२ , पाप मिटाया । म्हारा यीसू मसी....
- 4 यीसू जी थारी दया जगत में भारी ओ - २
थाने "मसिआ" जावै बलिहारी । म्हारा यीसू मसी....